

## **Skýrsla kjörnefndar um sameiningarkosningu Skorradalshrepps og Borgarbyggðar.**

Sveitarstjórn Borgarbyggðar fól yfirkjörstjórn sveitarfélagsins að vinna að kosningu um sameiningu Borgarbyggðar og Skorradalshrepps í samræmi við 5. gr. reglugerðar um íbúakosningar. Skorradalshreppur kaus tvo fulltrúa til að vinna að kosningunni. Fulltrúar Borgarbyggðar er Sóley Sigurpórsdóttir, Ólafur Pálsson og Sveinbjörn Eyjólfsson. Fulltrúar Skorradalshrepps eru Fjóla Benediktsdóttir og Óli Rúnar Ástþórsson

Nefndin kom fyrst saman 27. júní og hefur alls haldið 7 bókaða fundi samkvæmt meðfylgjandi fundargerðum. Þar fyrir utan hefur nefndin hist á fundum sem færðir hafa verið til bókar í gjörðabókum sveitarfélaganna. Nefndi byrjaði á að skipta með sér verkum. Sveinbjörn Eyjólfsson var kosinn formaður og Fjóla Benediktsdóttir ritari.

Að mörgu er að hyggja við íbúakosningar þannig að vel fari og ýmsar vörður sem þarf að virða, svo sem auglýsingar á dagsetningum, bréf til Þjóðskrár vegna kjörskrár, fá samþykkt ráðuneytis fyrir gerð og útlit kjörseðils og fleira. Í góðu samstarfi tókst nefndinni að gera þetta og ekki má gleyma aðstoð frá Jóni Hróa Finnssyni hjá KPMG. Þá var Þórunn Unnur Birgisdóttir nefndinni til aðstoðar, sérstaklega þegar leið á kosningu.

Kosning hófst föstudaginn 5. september.

Í Borgarbyggð var kosið alla virka frá 5. til og með 19. september. Kjörstaður var í ráðhúsi Borgarbyggðar Digranesgötu 1. Opnunartími þann 5. september var frá kl 10:00 til kl. 14:00. Alla aðra virka daga var hægt að kjósa í ráðhúsinu frá kl 12:00 til kl 14:00.

Föstudaginn 5. september voru það Sóley Sigurpórsdóttir og Ólafur Pálsson sem stýrðu kosningu í ráðhúsinu. Aðra virka daga var það Sóley sem stýrði kosningu, ásamt starfsmanni á skrifstofu Borgarbyggðar.

Fimmtudaginn 18. september voru opnaðir kjörstaðir í Lindartungukjördeild milli kl 18:00 og 20:00 og í Þinghamarskjördeild og Kleppjárnsreykjakjördeild milli kl 16:00 og 20:00. Undirkjörstjórnir viðkomandi kjördeilda sáu um kosningu í hverri deild. Þessar kjörstjórnir ásamt kjörstjórn Borgarneskjördeildar komu á fund í ráðhúsi miðvikudaginn 17. september og tóku við kjörgögnum hjá kjörnefndinni, sem síðan voru notuð í kosningum 18. og 20. september. Þá kom í ljós að það vantaði gjörðabók fyrir Þinghamarskjördeild. Þrátt fyrir leit fannst hún ekki í ráðhúsinu. Var þá hringt í formann yfirkjörstjórnar í norðvestur kjördæmi ef vera skyldi að hún hafi fylgt öðrum gögnum eftir alþingiskosningar á s.l. ári. Þar fannst hún og var keyrð til okkar í snatri og Sveinbjörn færði hana svo um kvöldið Brynjólfi Guðmundssyni í Hlöðutúni

Föstudaginn 19. september var opnuð fyrir hádegi kjördeild í Brákarhlíð fyrir heimilismenn þar. Sóley og Ólafur Pálsson sáu um þá kosningu

Kosningu í Borgarbyggð lauk svo laugardaginn 20. september þegar opinn var kjörstaður í Hjálmakletti milli kl 10:00 og 18:00. Þar gátu allir íbúar Borgarbyggðar kosið. Undirkjörstjórn Borgarneskjördeildar sá um þá kosningu.

Alla daga nema þann 18. september gátu kjósendur úr öllum kjördeildum Borgarbyggðar kosið í ráðhúsinu. Þann 18. september urðu menn að kjósa í sinni kjördeild.

Í Skorradalshreppi var kosið í Laugabúð, aðstöðuhúsinu við Hreppslaug. Þar var opið föstudaginn 5. september milli kl 10:00 og 14:00. Þann dag sáu Fjóla og Óli Rúnar um kosningu. Þá var opinn kjörstaður þar 8., 10., 15. og 18. september milli kl 16:00 og 18:00. Sóley var þar alla þá daga en Fjóla og Óli Rúnar sitt hvora tvo dagana. Að lokum var opinn kjörstaður í Laugabúð laugardaginn 20. september milli kl 10:00 og 18:00. Kjörstjórn Skorradalshrepps sá um þá kosningu.

Kjörstjórn lét prenta 3.000 atkvæðaseðla fyrir kjósendur í Borgarbyggð og 100 atkvæðaseðla fyrir Skorradalshrepp.

Á kjörskrá í Borgarbyggð voru 3.137 og í Skorradalshreppi 61.

Í Borgarbyggð kusu 501 kjósendur á kjörstöðum og einn kaus í póstkosningu, eða 16% kjósenda. Einn kjörseðill eyðilagðist við kosningu og fékk viðkomandi kjósandi annan kjörseðil. Þá skilaði sér ekki til baka einn kjörseðill sem sendur var með pósti. Atkvæði féllu þannig að 417 sögðu já eða 83,2% en 82 sögðu nei eða 16,4%. Tveir seðlar voru auðir en enginn ógildur.

Í Skorradalshreppi kusu 50 á kjörstað en fjórir kusu með póstkosningu, eða 88,5% kjósenda. Atkvæði féllu þannig að 32 sögðu já eða 59,3% en 22 sögðu nei eða 40,7%.

Sameiningin var því samþykkt í báðum sveitarfélögum af góðum meirihluta kjósenda.

Með vísan í ofangreint eru því 46 ónýttir kjörseðlar í Skorradal og 2497 ónýttir kjörseðlar í Borgarbyggð.

Kjörgögn voru alltaf geymd í læstri geymslu í skrifstofu Borgarbyggðar, þegar ekki var verið að kjósa. Sóley Sigurpórsdóttir fulltrúi í kjörstjórn tók að sér að stýra og sjá um kosningu í ráðhúsi Borgarbyggðar. Þá sá hún einnig um kosningu í Laugabúð í Skorradal, nema fyrsta og síðasta daginn. Með henni í ráðhúsi var starfsmaður Borgarbyggðar en Óli Rúnar Ástþórsson og Fjóla Benediktsdóttir voru með henni til skiptis í Laugabúð. Kjörgögn Skorradals voru einnig geymd í læstum hirslum Borgarbyggðar á milli kjörfunda.

Eftir að kjörfundi lauk í þremur kjördeildum Borgarbyggðar fimmtudaginn 18. sept. komu tveir úr hverri kjördeild í ráðhúsið með kjörgögn og kjörkassa. Tekið var á móti þeim þar og kjörgögn sett í læsta geymslu og ekki hreyfð fyrr en við talningu á laugardagskvöld.

Enginn kjósandi þurfti aðstoðarmann við kosningu.

Kl 17:00 laugardaginn 20. september, voru kjörkassar úr þremur kjördeildum, frá 18. sept., fluttir úr ráðhúsi í Hjálmaklett. Gætt var að innsiglum og hafði ekkert verið átt við kassana.

Talning fór fram í Hjálmakletti og hófst kl 19:00 með því að stemma af atkvæði í hverjum kassa við kjörskrár og gerðabækur. Allt reyndist stemma og engin athugasemd gerð við framkvæmd. Þá voru atkvæði talin, fyrst úr Borgarbyggð og síðan úr Skorradal. Allir 5 kjörnefndarmenn voru við talningu ásamt 6 aðilum sem fengnir voru í talningu. Talning gekk fljótt og vel og var lokið fyrir kl. 20:00. Öll atkvæði voru talin gild og engin úrskurðuð ógild. Einungis 2 atkvæði voru auð.

Eftir að talningu lauk var farið með öll kjörgögn í ráðhús Borgarbyggðar og þau sett í læsta hirslu.

Í stuttu máli má segja að öll framkvæmd kosninga hafi gengið vel og ekkert komið upp á sem deilt var um. Þá vann nefndin vel saman og traust ríkti hjá nefndarmönnum.

Rétt er að geta þess að fyrstu kjörskrár sem komu frá Þjóðskrá voru ekki allskostar réttar. Þess vegna gaf Þjóðskrá út nýjar kjörskrár. Fyrir Borgarbyggð voru þær ekki mjög ólíkar en öðru máli gegndi um kjörskrá Skorradalshrepps. Þar höfðu orðið breytingar. Kom í ljós að fjölgað hafði nokkuð kjósendum þar. Í framhaldi af því kom umræða um réttmæti þeirra breytinga og voru bæði Þjóðskrá og Innviðaráðuneyti send bréf og „kæsur“. Kjörnefnd fylgdist með úr fjarlægð en átti ekki neina beina aðkomu að því máli. Bæði Þjóðskrá og ráðuneyti afgreiddu málið og það varð ekki til að breyta kosningu eða kosningarétti.

Allnokkur vinna fylgdi kjörnefndarstörfum, bæði vegna funda og svo framkvæmd kosninga. Skýrslu þessari fylgir yfirlit frá nefndarmönnum fyrir vinnuframlag.

Nú er einungis eftir að eyða kjörgögnum en það verður ekki gert fyrr en kærufrestur er útrunninn.

### **Yfirlit yfir kosningu í hverri kjördeild.**

Lindartungukjördeild fékk 100 kjörseðla. 7 kusu. Ónýttir seðlar voru 93

Þinghamarskjördeild fékk 300 kjörseðla, 20 kusu. Ónýttir seðlar voru 280.

Kleppjárnsreykjakjördeild fékk 400 kjörseðla. 71 kaus. Ónýttir seðlar 329

Borgarneskjördeild fékk 500 kjörseðla. 214 greiddu atkvæði. 286 Ónýttir seðlar.

Ráðhúskjördeild og Brákarhlíð fékk 300 kjörseðla. 188 greiddu atkvæði á þeim stöðum. 2 seðlar voru sendir kjósendum og einn ónýttist. Ónýttir seðlar voru því 109.

1400 kjörseðlar fóru aldrei úr húsi og voru allan tíman geymdir í innsigluðum kassa.

Samtals eru því 2.497 kjörseðlar ónýttir og í vörslu kjörnefndar.

Borgarfirði / 2025

---

Sveinbjörn Eyjólfsson

---

Fjóla Benediktsdóttir

---

Sóley Sigurþórsdóttir

---

Óli Rúnar Ástþórsson

---

Ólafur Pálsson